

TUTÚ NÍ CADÚHA TĚ PĀBLŮ QUIHÍⁿ NDAHA ÑÁYIU DISTRITÚ GÁLACIÁ

*Té Pāblú cādūha-dé tutú quihíⁿ ndaha nchaa ñáyi
sàndáá iní ñáhá xii Xítóhó Jesucrístú ndécú dīstrítú
Gálaciá*

¹ Te yúhú té Pāblú ní tendaha ñaha Xítóhó Jesu-
crístú, ndihí Dútú Ndiöxí véxi-í càháⁿ-í tnúhu-gá. Te
điu Yá Ndiöxí ní dándótó-gă Xítóhó Jesucrístú Yaá
ní xíhí ní cùu. Te cāchí tnúhu-í xii-ndo sã ñà dīú
ñáyi ñuyíú-a ní tendaha ñaha xii-í véxi-í, te ni Yá
Ndiöxí te ni Xítóhó Jesucrístú ñá túú ní xāhaⁿ-gă
xii ñⁿ ñáyi quixí-yu cachí tnúhu-yu nācuāa cada-í.

² Te yúhú té Pāblú cādūha-í tutú-a ndihí nchaa
dava-gá ñáyi ndècu ichi Yá Ndiöxí ndécú ndihí-í
iha cuendá daquixi-í ndaha nchòhó ñáyi sàndáá
iní ñáhá xii Xítóhó Jesucrístú ndécú dīstrítú Gálaciá.

³ Te xicáⁿ táhù-í núú Dútú Ndiöxí, ndihí núú Xítóhó
Jesu-crístú sá ïo na chindee chitúu ñaha-gá xii-ndo,
te ducaⁿ ndi nduú-gá ná cádá te ïo váha cuu iní-ndó
cūndecu-ndo.

⁴ Te Xítóhó Jesucrístú ní xíhí-gá
sá cuendá nchaa cuéchi nchoo cuè ñáyi ndècu
ñuyíú-a. Te ducaⁿ ñi quide-gá, chi cuiní-gá sá vã
cūndècu-o ichi cuehé ichi duha. Te ducaⁿ ñi cuu,
chi Dútú Ndiöxí ducaⁿ ñi cuiní-gá cunduu. ⁵ Te
ïo chí ná ndàcáⁿ táhú-ó nūú Yá Ndiöxí cuendá sá
ïo cāhnu cuu-gá, te điu-ni ducaⁿ càda-o ni caa ni
quihíⁿ! Te ducaⁿ na cūnduu.

Mee-ni tnũhu Xítohó Jesucrístú cúu-xi tnũhu sá cãháⁿ nãcuáa naníhí tãhú-ó

⁶ Te ío cũnúhu-í cúu chi ío ndĩhi ní dáñá-ndó ìchi Yá Ndiõxí. Te Yaá-áⁿ nĩ cãháⁿ ñáhá-gã xii-ndo, chi Xítohó Jesucrístú ío ní cundàhú iní ñáhá-gã ní quide váha ñaha-gã xii-ndo, te vitna dàcuaha tucu-ndo ìngá tnúhu, te cãchí-ndó sã xĩãⁿ dàcãcu nihnu ñaha-xi xii-ndo núú ùhú núú ndàhú. ⁷ Dico ñáhá, chi ñá túú-gã tnúhu sá dácãcu nihnu ñaha xii-o núú ùhú núú ndàhú. Te dìcò-ni sá ío ñáyiu véxi dàticá nuu ñáhá-yu xii-ndo dãnehé ñáhã-yu tnúhu sá dácũta nihnu ñaha xii-ndo, chi tnúhu-áⁿ ñã túú cùu-xi tnúhu Xítohó Jesucrístú. ⁸ Te yúhú cãháⁿ-í tnúhu Xítohó Jesucrístú, dico núu ío ñáyiu véxi dãnehé ñáhá xii-ndo ìngá tnúhu sá ñã túú ní dãnehé ñáhà-í xii-ndo, te nchòhó cachí-ndó sã ñáyiu-áⁿ nacháhu-yu núú Yã Ndiõxí sá dúcãⁿ quidé-yu. Te cuèi yúhú, te núu na dàma-í tnúhu danèhé ñáhà-í xii-ndo, te ñiu-ni ducaⁿ cãháⁿ-ndó sã nãchãhu-í núú-gã te núu ducaⁿ na càda-í. Àdi te núu ìⁿ espíritú xínú cuèchi núú-gã véxi-xi cãháⁿ-xi ìngá tnúhu sá ñã túú ní dãnehé ñáhà-í xii-ndo nãcuáa naníhí tãhú-ndó ñã, te ñiu-ni ducaⁿ cãháⁿ-ndó sã nãchãhu-xi núú Yã Ndiõxí te núu ducaⁿ na càda-xi. ⁹ Te ñiu-ni duha sa ní dãnehé ñáhà-í xii-ndo sã nõu véxi ñáyiu dãnehé ñáhá ìngá tnúhu sá ñã túú ní dãnehé ñáhà-í xii-ndo nãcuáa naníhí tãhú-ndó ñã, te cachí-ndó sã ñáyiu-áⁿ nacháhu-yu núú Yã Ndiõxí sá dúcãⁿ quidé-yu, duha ní cachí-í xii-ndo.

¹⁰ Te duha ndũu tnúhu cãháⁿ-í chi nchòhó sa xíní-ndó sã yúhú cuíní-í sá Yã Ndiõxí cãháⁿ-gã sá quidé vãha-í ndécù-í, te ñã díú sã ñáyiu ñuyíú-a cachí-yu sá quidé vãha-í, àdi sã ío cùdĩĩ iní-yu nchaa

nàcuáa quide-í ndécù-í. Te núu na càni iní-í cudù-í nùú ñáyü ñuyú-a, te ñá túú cùu-í téé xínu cuechi nùú Xítohó Jesucristú te núu ducaⁿ na càda-í.

Nàcuáa ní cuu ní ngüita té Păblú càháⁿ-dé tnúhu Yá Ndiöxí

¹¹⁻¹² Te nchòhó ñáyü ndècu ndihí-í ichi Xítohó Jesucristú càchí tnúhu-í xii-ndo sã tnúhu sá dánèhé ñáhà-í xii-ndo nàcuáa naníhí tãhú-ndó cùu-xi tnúhu sá ñí cachí tnúhu mee Xítohó Jesucristú xii-í, te ñá díú ñáyü ñuyú-a ni càhu iní-yu tnúhu-áⁿ, àdi danehé ñáhã-yu xii-í, chi mee Xítohó Jesucristú ní dánèhé ñáhá-gã.

¹³ Te nchòhó sa nihí-ndó tnúhu nàcuáa ní xóo cada-í cùtnàhá nchìcúⁿ nihnu-í nchaa nàcuáa dàcuaha ñáyü cùu ndi mee-í ñáyü isràél ní cùu. Te dàvá-áⁿ ïo ní xóo cuu úhú iní-í nchaa ñáyü ndècu ichi Yá Ndiöxí, te nándi sá ñí xóo cada-í-yu, te ní cuiní-í danàa-í-yu ni cùu. ¹⁴ Te yúhú ío-gá ní xóo quene cáva-í ní xóo dacuàha-í nchaa sá dacuàha ñáyü cùu ndi mee-í dácúúxí ñáyü ñni-ñi cuìà-í ndihí-yu ni cùu, te ío-gá ní xóo cuiní-í cada ndáá-í canchicúⁿ nihnu-í nchaa nàcuáa ní dánèhé ñáhá cuè ñaní tnáhà-í ní xíndecu ndéé sanaha ni cùu. ¹⁵ Te ndéé cùtnàhá vátá cécú-gã-í Yá Ndiöxí sa nèhe váha ñaha-gã xii-í cuèndá sá càháⁿ-í tnúhu-gá, núu xíãⁿ ní càháⁿ ñáhá-gã xii-í quidè-í chùⁿ-gá vitna, te sá dúcáⁿ ñí quide-gá te ío váha ní quide ñaha-gã xii-í. ¹⁶ Te òré ní càháⁿ ñáhá Yá Ndiöxí xii-í te ní cachí tnúhu-gá cuèndá Déhe-gá Xítohó Jesucristú. Te ducaⁿ ñí quide Yá Ndiöxí cuèndá sá cuiní-gá sá cũñaha-í xii ñáyü ñá túú cùu ñáyü isràél cuèndá Yaá cúú Dèhe-gá. Te cùtnàhá ní càháⁿ ñáhá Yá Ndiöxí xii-í, te vá yõ ñni-ñi dèi núú-xi ni ndùcu

tnúhu-í nàcuáa cada-í. ¹⁷ Te ni ñà túú ní sáháⁿ-í ñúú Jerusàlén nducu tnúhu-í núú cuè téé díhna nuu nĩ tendaha Xítóhó Jesucristú càháⁿ tnúhu-gá nũu nása cada-í, chi ndĩhi-ni ní sáháⁿ-í distritú Àrabiá ní xíndecu tnaa-í te dàtnùní cuánuhú tucu-í ñúú Dàmascú.

¹⁸ Te núú ùní cuiá sã nĩ càháⁿ ñáhá Yã Ndiõxí xii-í, te ní sáháⁿ tucu-í ñúú Jerusàlén ní càháⁿ ndĩhi-í té Pèlú, te ní xíndecu-í ndĩhi-dé sáhúⁿ nduu. ¹⁹ Te tnàhá té Jàcobó ñaní Xítóhó Jesucristú ní càháⁿ ndĩhi-í. Te ñà túú ní xìní-í dava-gá cue téé ní tendaha Xítóhó Jesucristú càháⁿ tnúhu-gá. ²⁰ Te Yá Ndiõxí ndéhé ndĩi ndehe caxi-gá sá ncháá tnúhu tèe-í núú tùtú-a sá cúú-xí-ndó cùu-xi #ⁿ sá ndàá.

²¹ Te sátá nĩ sáháⁿ-í ñúú Jerusàlén, te dàtnùní ní sáháⁿ-í distritú Sìriá, ndĩhi distritú Cìliciá. ²² Te nchaa ñáyiu xíndecu ichi Xítóhó Jesucristú ndécú distritú Júdeá ñà túú xìní ñáhã-yu xii-í ní cùu. ²³ Dico ní xóo níhĩ-yu tnúhu nchaa nàcuáa ní xóo cada-í, te ní cachí-yu: “Téé cùu úhú iní ñáhá xii nchaa nchoo ñáyiu ndècu ichi Xítóhó Jesucristú càháⁿ-dé tnúhu-gá núú ñáyiu cuendá quíndáá iní ñáhã-yu xii-gá, te diu-dé nãndi sá quidé ñàha-dé, te cuíní-dé danàa ñaha-dé cuendá sá vã cóo-gã ñáyiu quíndáá iní ñáhá xii-gá ní cùu”, duha ní cachí-yu cuendá-í. ²⁴ Te ní ngũíta-yu ní cachí-yu sá ïo càhnu cuu Yá Ndiõxí cuendá sá ñà túú-gã quidé-í dàtná ní xóo cada-í.

2

Té Pãblú ní níhí tnáhá-dě ndĩhi dava-gá cue téé càháⁿ tnúhu Yá Ndiõxí

1 Te ní núnahá úxícúmí cuíá sǎ nǐ sáháⁿ-í ñúú Jerusálén ní cáháⁿ ndihí-í té Pèlú, te dǎtnùní ndécà-í té Bèé ní sáháⁿ, te tnàhá té Títú ní sáháⁿ ndihí-ndí-dé. 2 Te ní sáháⁿ-í chi mee Yǎ Ndiǒxí ní cachí-gá sá quihíⁿ-í. Te yàcáⁿ ní tacá mee-ni cuè téé cùnūu. Te ní xáhaⁿ-í xii-güedé nàcuáa ndùu tnúhu dànehé-í ñáyiú ñá túú cùu ñáyiú isràél cuendá naníhí tàhú-yu. Te ducaⁿ nǐ quide-í cuendá cuíní-í quini-güedé nàcuáa ndùu chiuⁿ quide-í, chi nacuáháⁿ cachí-güedé sá ñà túú nàndíhi-xi. 3 Te té Títú téé ndècu ndihí-í chi ñá díú tée isràél cúú-dě, dico ñá túú ní quide yica-güedé cuáha-güedé sèñá ñii-dé. 4 Te ñáyiú cǎchí sá ndécú ìchi Xítóhó Jesucristú te ñá ndáá sá ndécũ-yu ichi-gá, ñáyiú-áⁿ nǐ chitnahá ñáhǎ-yu xii-ndí cuendá cuíní-yu quini-yu nása quide-ndí ndécú-ndí ichi Xítóhó Jesucristú. Te ducaⁿ nǐ quidé-yu cuendá sá nchũhú sa ní cácu nihnu-ndí ñá túú-gǎ quidé-ndí nchaa nàcuáa ní cáháⁿ ndíi Moisés. Te cuíní-yu sá núcuíta saa tucu-ndí cada-ndí nchaa nàcuáa ní cáháⁿ ndíi núcúndecu-ndí dàtná ní xíndecu-ndí cútnàhá vátá cǎcu nihnu-gá-ndí núú tnũhu-áⁿ ni cùu. 5 Te nchúhú ñá túú tnàhí ni dàña-ndí méé-ndí dandàhú ñáhǎ-yu xii-ndí. Te ducaⁿ nǐ quide-ndí, chi cuíní-ndí sá ñà túú ñǎgá tnúhu dácánūu ndihí tnúhu sá càháⁿ nàcuáa naníhí tàhú-ó ndècu ndihí-ndo.

6 Te ni ñⁿ tnúhu sá vátá quini-gá-í ñá túú ní cǎchí tnúhu cue téé cùnūu núú ñáyiú cada-í. Dico yúhú chi ñá túú ní quide cuendá-í nũu cùnūu-güedé àdi ñá túú cùnūu-güedé, chi núú Yǎ Ndiǒxí ñⁿ-ni cùu-o nchaa-o. 7 Te ní cutnùní iní-güedé sá Yǎ Ndiǒxí ní cachí-gá xii-í sá càháⁿ-í tnúhu-gá núú ñáyiú ñá

túú cùu ñáyiú isràél dàtná ní quide-gá té Pèlú ní xáhaⁿ-gã càháⁿ-dé tnúhu-gá núú ñáyiú isràél. ⁸ Te ducaⁿ ñi cutnùní iní-güedé, chi ñiú-ni Yá Ndiöxí Yáá chindèe ñaha xii té Pèlú càháⁿ-dé tnúhu-gá núú ñáyiú isràél, ñiú-ni Yáá-áⁿ chindèe ñaha-gá xii-í càháⁿ-í tnúhu-gá núú ñáyiú ñá túú cùu ñáyiú isràél.

⁹ Te té Jàcobó, ndihí té Pèlú, ndihí té Juàá, cue tée ío cùnuu-gá ní cutnùní iní-güedé sá Yá Ndiöxí ío chindèe ñaha-gá xii-í quidè-í chùuⁿ-gá. Te ío váha ní cáháⁿ ndihí ñaha-güedé xii-í, ndihí té Bèé, te ní cuu ñiⁿnuu-ndí sá nchùhú quíhíⁿ-ndí cáháⁿ-ndí tnúhu Yá Ndiöxí núú nchàa ñáyiú ñá túú cùu ñáyiú isràél, te mee-güedé cáháⁿ-güedé tnúhu-gá núú ñáyiú isràél. ¹⁰ Te ñiⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chindèe-ndí cue ñáyiú ndàhú, te sa ducaⁿ tnàhí sàni iní-ndí cada-ndí.

Té Páblú càháⁿ-dé dóho té Pèlú ñuú Antiòquia

¹¹ Te cùtnàhá ní sáháⁿ té Pèlú ñuú Antiòquia yàcáⁿ ní cáháⁿ-í dóho-dé, chi quide-dé ñiⁿ sá ñà túú tàú-dé cada-dé ní cùu. ¹² Te quide váha-dé ní cùu chi xèxi-dé ndihí ñáyiú ñá túú cùu ñáyiú isràél, dico òré ní sáá ñiⁿ ùú ñáyiú cùndihí té Jàcobó, te òré-áⁿ ñà túú-gã ní cuìní-dé caxi-dé ndihí ñáyiú-áⁿ. Te ducaⁿ ní quide-dé chi ní yùhú-dé cue ñáyiú nchìcúⁿ nihnu quide nchaa nacuaá ní cáháⁿ ndí Moisés sá vã càháⁿ váha-yu cuendá-dé. ¹³ Te tnàhá dava-gá ñáyiú isràél xíndecu ichi Yá Ndiöxí ñá túú quide váha-yu, chi quidé-yu dàtná quidé tã Pèlú ní cùu, te ndéé tnàhá té Bèé ní ngúíta-dé ducaⁿ quide-dé ní cùu. ¹⁴ Te òré ní xiní-í sá ñà túú quide-güedé ndihí-yu nàcuáa càháⁿ tnúhu Yá Ndiöxí, te núú

nchàa ñáyiú ndècu ichi Yá Ndiöxí ní xáhaⁿ-í xii té Pèlú: “Yòhó cúú-n tée isràél, te ñá túú quide-n nchaa nacuáa quide ñáyiú isràél, chi quide-ni-n datná quidé nchàa ñáyiú ñá túú cùu ñáyiú isràél. Te núu ducaⁿ quide-n, ¿te ná cuèndá dánèhé-n ñáyiú ñá túú cùu ñáyiú isràél sá cáďa-yu nchaa nacuáa quide ñáyiú isràél?”, duha ní xáhaⁿ-í xii té Pèlú.

Iⁿ-ni nàníhí tàhú-ó ndíhi ñáyiú isràél nũu na quèndáá iní-ó Xítohó Jesucristú ndíhi-yu

¹⁵ Te yúhú ndíhi té Pèlú cúú-ndí ñaní tnáhá ñáyiú isràél, te ñá túú ndècu-ndí ichi cuèhé ichi duha datná ndécú nchàa ñáyiú ñá túú cùu ñáyiú isràél.

¹⁶ Te xíní-ó sá vǎ cùndècu-gá cuéchi-o nũú Yá Ndiöxí te núu na quèndáá iní-ó Xítohó Jesucristú, te ñá díú sǎ cáncíhíⁿ nihnu-o cáďa-o nchaa nacuáa ní cáhǎⁿ ndíi Moisés. Te tnáhá dava nchúhú ñáyiú isràél sàndáá iní-ndí Xítohó Jesucristú, te xǎⁿ cútnùní iní-ndí sá ñà túú-gǎ cuéchi-ndí ndécú nũú-gǎ, dico ñá díú sǎ ñí cáncíhíⁿ nihnu-ndí ní quide-ndí nacuáa ní cáhǎⁿ ndíi Moisés, chi cuèndá sá sàndáá iní-ndí Xítohó Jesucristú. Te vǎ yǎo ñⁿ cachí-ó sǎ ñà túú ndècu cuéchi-xi núú Yá Ndiöxí cuèndá sá nchíⁿ nihnú-yu nchaa nacuáa ní cáhǎⁿ ndíi Moisés.

¹⁷ Te núu cuèní-ó sǎ vǎ cùndècu cuéchi-o nũú Yá Ndiöxí cuèndá sá sàndáá iní-ó Xítohó Jesucristú, te xǎⁿ cútnùní iní-ó sǎ ñà túú quide váha-o. ¿Te vǎ cúú tnáhí caní iní-ó sǎ Xítohó Jesucristú dánèhé ñáhǎ-gǎ xii-o sǎ vǎ cáďá vǎha-o cùndecu-o! ¹⁸ Te yúhú càchí-í sǎ vǎ cáncíhíⁿ nihnu-gǎ-ó nchàa nacuáa ní cáhǎⁿ ndíi Moisés, dico núu vitna càchí-í sǎ xíní ñùhu-xi cáďa-o nchaa nacuáa ní cáhǎⁿ

ndíi ña, te ñá túú quide váha-í núú Yă Ndiöxí te núu ducaⁿ na càda-í. ¹⁹ Te yúhú duuⁿ duuⁿ ní cutnùní iní-í sá vă ndácù-í cada-í nchaa nàcuáa ní cáháⁿ ndíi Moisés nùu xiáⁿ ní dǎñà-í ñá túú-gă nchìcùⁿ nihnu-í nchaa nàcuáa ní cáháⁿ ndíi cuendá sá cuìní-í cundecu-í sá cúú-xí Yă Ndiöxí. ²⁰ Te Xítóhó Jesucrìstú ní xíhí-gá cuendá-í, dico dàtná tnúhu sá tnàhá-í ní xíhí ndìhi-gá, chi ñá cúú-gă cada-í nchaa nàcuáa sàni iní mèè-í, chi Xítóhó Jesucrìstú-nă ndécú ndìhi ñaha-gá xii-í táxí tnùní ñáhá-gă. Te vitna ndècu-í ñuyíú-a, te ío sàndáa iní-í Xítóhó Jesucrìstú Déhe Yă Ndiöxí, te chìndee ñaha-gá xii-í. Te diu-ni Xítóhó Jesucrìstú ío cùu iní ñáhá-gă xii-í nùu ní xíhí-gá núú cùrúxí sá cuendá-í. ²¹ Te vitna ñá túú dàquee tíhù-í sá vǎha ní quide ñaha Yă Ndiöxí xii-í, chi núu ni ndàcu-o vá cùndècu cuéchi-o nùú Yă Ndiöxí cuendá sá nchìcùⁿ nihnu-o quide-o nchaa nacuáa ní cáháⁿ ndíi Moisés ní cùu ña, te àúⁿ nă cuu ní xíhí Xítóhó Jesucrìstú ní cùu te núu ducaⁿ.

3

Vá dǎñá ndèé-ó quèndáa iní-ó tnúhu Xítóhó Jesucrìstú

¹ Te nchòhó ñáyíu distritú Gàlaciá, ñáyíu sa xíndecu ichi Xítóhó Jesucrìstú, ¿ná cuendá ío ñí iní-ndó ñă cuìní-ndó tnèi-ndo nchaa tnúhu cáháⁿ-gá?, ¿te yoo ní dádǎhu ndodo iní ñáhá xii-ndo núu ducaⁿ quide-ndo? Te naha-ndo sá ío váha ní dánèhé ñáhá-ndí xii-ndo nàcuáa ní cuu ní xíhí Xítóhó Jesucrìstú. ² Te vitna cáháⁿ-ndó nùu sá nchìcùⁿ nihnu-ndo nchaa nacuáa ní cáháⁿ ndíi Moisés ní níhí-ndó Espíritú Yă Ndiöxí

ndécú ndìhi-ndo, àdi sá ni sàndáá iní-ndó tnũhu Xítoho Jesucrístú sá nĩ dánèhé ñáhá-ndĩ xii-ndo nĩ níhí-ndó Espíritú-gá ndécú ndìhi-ndo. ³ Te nchòhó ío nĩ dĩquí-ndó chi Espíritú Yă Ndiõxí tá quide váha ñaha-xi xii-ndo cuáháⁿ ní cùu. ¿Te náa vitna mee-nă-ndó cuiní-ndó càda-ndo nacúáa ta quide ñaha Espíritú-gá cuáháⁿ xii-ndo ni cùu-áⁿ? ⁴ Te sàni ìⁿ sàni úú iní-í cuendá-ndó sã àúⁿ nă cuu nándi yáha-ndo ndècu-ndo ichi Yá Ndiõxí. ⁵ Te xini-ndó sã Yă Ndiõxí ní taxi-gá Espíritú-gá ní ngúndecu ndìhi-ndo, te ní quide-gá sá vă yõ tnàhí ndàcu cada núú-ndó nĩ xini-ndó. Te ducaⁿ nĩ quide-gá, chi ní sàndáá iní-ndó-gă, dico ñá dĩú cuendá nchaa nàcuáa ní cachí ndíi Moisés cada ñáyiú ducaⁿ nĩ quide-gá.

⁶ Te ndíi Àbrahám ducaⁿ ìo ní sàndáá iní ndíi Yá Ndiõxí, núu xĩãⁿ ní cachí-gá sá nĩ cudíu ndíi núú-gă sá dúcáⁿ nĩ quide ndíi. ⁷ Te càchí tnũhu ndáá-í xii-ndo sã ncháá ñáyiú sàndáá iní ñáhá xii Yá Ndiõxí dàtná ní sàndáá iní ñáhá ndíi Àbrahám xii-gá, ñáyiú-áⁿ ìⁿ-ni cùú-yu ndìhi ndíi núú-gă. ⁸ Te núú tütú Yă Ndiõxí ní ngódó tnùní tnũhu váha, tnũhu sá nĩ xáhaⁿ Yă Ndiõxí xii ndíi Àbrahám, te duha ní xáhaⁿ-gă xii ndíi: “Nchaa ñáyiú nìhì ñuyíú cada váha-í-yu sá cuendá-n”, duha ní xáhaⁿ-gă xii ndíi. Te sá dúcáⁿ nĩ ngódó tnùní núú tütú Yă Ndiõxí ndéé dàvá-áⁿ, te xĩãⁿ cútnùní sá sáa nduu, te cue ñáyiú ñá túú cùu ñáyiú isràél vá cùndècu-gá cuéchi-yu núú-gă te núu na quíndáá iní ñáhă-yu xii-gă. ⁹ Te xĩãⁿ núu nchaa ñáyiú sàndáá iní ñáhá xii Yá Ndiõxí cada váha ñaha-gă xii-yu dàtná ní quide váha-gá ndíi Àbrahám, chi ndíi-áⁿ ducaⁿ nĩ sàndáá

iní ñáhá ndíi xii-gá.

¹⁰ Te nchaa ñáyiú cuení cada nchaa nàcuáa ní cáháⁿ ndíi Moisés cuendá sá cuení-yu sá vǎ cùndècu-gá cuéchi-yu núú Yǎ Ndiǒxí, ñáyiú-áⁿ dañá ñihnu ñaha-gá xii-yu, chi vá ndácǔ-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tütú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te dañá ñihnu ñaha-gá xii-yu.

¹¹ Te núú na càncicúⁿ ñihnu-ñi-o càda-o nacuáa ní cáháⁿ ndíi Moisés, te ñá túú vèdana chindee ñaha-xi xii-o nacuáa vá cùndècu-gá cuéchi-o núú Yǎ Ndiǒxí. Te ndáá chi núú tütú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gǎ cuéchi-xi ndècu ío váha ndècú-yu núú-gǎ. ¹² Te núú dìcò ìò ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xini ñuhu-xi quindáá iní-yu tnúhu Xítóhó Jesucristú, chi núú tütú Yǎ Ndiǒxí càchí-xi sá núú dìcò ìò ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yǎ Ndiǒxí.

¹³ Te tnúhu ní chídó tnùní ndíi Moisés càchí-xi sá ìò ndècu cuéchi-o núú Yǎ Ndiǒxí cuendá sá ñǎ ndácú-ó càda-o nchaa nacuáa ní cáháⁿ ndíi, te cuendá xiǎⁿ tá dañá ñihnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuéchi-o cuendá sá vǎ dáñá ñihnu ñaha-gá Yǎ Ndiǒxí xii-o. Te càchí-xi núú tütú Yǎ Ndiǒxí: “Íⁿ téé na càta caa-güedé ìⁿ yutnu, te téé-áⁿ cuú-dé téé dañá ñihnu ñaha Yǎ Ndiǒxí”, duha càchí-xi núú tütú-gá. ¹⁴ Te ducaⁿ ñí yáha Xítóhó Jesucristú, chi cuení Yǎ Ndiǒxí sá ndùu táhú nchaa ñáyiú ñá túú cùu ñáyiú isràèl cundecu váha-yu dàtná ní nduu táhú ndíi

Àbrahám ndécú vǎha ndíi. Te ducaⁿ ñi yáha-gá cuendá nchaa nchoo ñáyiú sàndáá iní ñáhá xii-gá ngúndecu ndihí-o Espíritú Yǎ Ndiǒxí sá ñi cachí méé-gǎ taxi-gá.

Nàcuáa ní cachí Yǎ Ndiǒxí cada-gá

¹⁵ Te nchòhó cue ñáyiú ndècu ndihí-í ichi Yá Ndiǒxí na càchí tnúhu-í xii-ndo nàcuáa quide cue ñáyiú ñuyíú-a cuendá tecú tnùnì-gá-ndó nàcuáa quide Yá Ndiǒxí. Chi ñáyiú-áⁿ òré cuìnì-yu cadá-yu ñⁿ sá cadǎ-yu, te díhna-gá ndátnúhu-yu te òré cúú ñⁿnuú-yu, te sáha firmá-yu ñⁿ tutú te tutú-áⁿ vǎ yǒo ñⁿ ndacu cáháⁿ sá vǎ nándíhi-gá-xi, te ni vǎ yǒo-gá ndacu nágá tnúhu chido tnùnì núú-xí. ¹⁶ Te ducaⁿ ñi quide Yá Ndiǒxí ndihí ndíi Àbrahám, chi ní xáhaⁿ-gǎ xii ndíi nàcuáa cada-gá, te tnúhu-áⁿ cúú-xí cuendá méé ndíi ndihí cuendá ñⁿ ñanì tnáhá ndíi cundecu ñuyíú-a ndéé cuéé-gá. Te núú tütú-gá càchí-xi sá tnúhu-áⁿ cúú-xí cuendá ñⁿ-ni ñanì tnáhá ndíi te ñá díú cuendá nchaá-yu. Te ñanì tnáhá ndíi téé cùu cuendá tnúhu-áⁿ cúú Xítohó Jesucristú. ¹⁷ Te na càchí tnúhu-í xii-ndo sǎ Yǎ Ndiǒxí ní quide ndáá duuⁿ-gá ndihí ndíi Àbrahám nàcuáa cada-gá. Te sa ní cuu cúmí cièndú ócò úxí cuíá sǎ dúcáⁿ ñi xáhaⁿ Yǎ Ndiǒxí xii ndíi Àbrahám, te dàtnùnì ní xáhaⁿ-gǎ xii ndíi Moisés chido tnùnì ndíi nàcuáa cada ñáyiú, te nchaa tnúhu ní chídó tnùnì ndíi Moisés ñá túú dàquee tíhú-xi tnúhu sá ñi xáhaⁿ Yǎ Ndiǒxí xii ndíi Àbrahám nàcuáa cada-gá. ¹⁸ Te núú dicó cuendá nchaa tnúhu sá ñi chídó tnùnì ndíi Moisés ní nàníhí tàhú-ó ñá, te ñá túú-gǎ xini ñúhu-xi cada cuendá-ó tnúhu ní xáhaⁿ Yǎ Ndiǒxí xii ndíi Àbrahám cada-gá ní cùu te núu ducaⁿ. Te

ndíi-áⁿ nǐ naníhí tàhú ndíi chi ducaⁿ nǐ cachí Yǎ Ndiöxí cada ñaha-gǎ xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xí nchìcúⁿ nihnu ñáyiú cuèndá ducaⁿ cùtnuní iní-yu sá ndécú cuèchi-yu, te nchìcúⁿ nihnu-ní-yu ndéé ní sáá nduu nǐ quexìo Yaá cúú ñàní tnáhá ndíi Àbrahám, chi Yaá-áⁿ ducaⁿ nǐ xáhaⁿ Yǎ Ndiöxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiöxí ní tendaha-gǎ cue espíritú xínú cuèchi núú-gǎ ní sáháⁿ-xí ní xítñúhu ñaha-xí xii ndíi nàcuáa danèhé ndíi ñáyiú. ²⁰ Te Yá Ndiöxí ñá túú ní cáháⁿ-gǎ núú méé ñáyiú, chi ndíi Moisés ní cáháⁿ ndíi yuhu-gǎ núú-yu, dico cútnáhá ní cáháⁿ ndíi-gǎ ndíi Àbrahám chi núú méé núú ííⁿ ndíi ndíi-gǎ ní xáhaⁿ-gǎ xii ndíi nàcuáa cada-gǎ.

Nàcuáa ndíi nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yǎ Ndiöxí xii ndíi Àbrahám cada-gǎ, ñá túú dàquee tíhú tnáhá-xí. Te núú dícó náníhí tàhú ñáyiú nchìcúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gǎ cuèndá-ní sá nchìcúⁿ nihnú-yu nchaa nàcuáa ní cáháⁿ ndíi ní cùu. ²² Te núú tütú Yǎ Ndiöxí càchí-xí: “Nchaa nchòhó ñáyiú ndècu ñuyíú ndécú cuèchi-ndo”, duha càchí-xí. Te ducaⁿ càháⁿ-xí cuèndá quíndáá iní-ó Xítohó Jesucrístú, te naníhí tàhú-ó chi ducaⁿ nǐ cachí Yǎ Ndiöxí cada-gǎ.

²³ Te cútnáhá vátá cùndècu ndíi-gǎ-ó tnúhu Xítohó Jesucrístú, te nchìcúⁿ nihnu-o nchàa nàcuáa ní cáháⁿ ndíi Moisés, te ní cutnùní iní-ó sǎ ïo ndècu cuèchi-o ní cùu. Te ducaⁿ-ní nchìcúⁿ nihnu-o ndéé

ní sáá nduu nĩ quexìo Xítohó Jesucrìstú ñuyíú-a, te ní sándáá iní-ó-gă. ²⁴ Te nchaa tnúhu sá nĩ chídó tnùnì ndíi Moisés ní sanu ichi ñaha-xi xìi-o nacuáa cada-o cùndecu-o, te ducaⁿ-nì sànu ichi ñaha-xi xii-o ndéé ní sáá nduu ní quexìo Xítohó Jesucrìstú ñuyíú-a. Te ducaⁿ nĩ cuu cuèndá quíndáá iní-ó-gă, te vá cùndècu-gá cuèchi-o nũú Yă Ndiöxí. ²⁵ Te vitna ní ngùndecu ndihì-o tnũhu Xítohó Jesucrìstú, te ñá túú-gă xínì ñùhu-xi canu ichi ñaha nchaa tnúhu ní chídó tnùnì ndíi Moisés.

²⁶ Te vitna tnàhá nchaa nchòhó cúú-ndó dēhe Yă Ndiöxí, chi ní sándáá iní-ndó Xítohó Jesucrìstú. ²⁷ Te nchòhó ní sandute-ndo dàtná càchì-gá, te ndècu-ndo ndihì-gá, te quède-ndo nchaa nacuáa ní cáháⁿ-gá ndécú-ndó, te ío ndècu yìñuhu-ndo núú Yă Ndiöxí dàtná ndécú yìñuhu mee Xítohó Jesucrìstú. ²⁸ Te vitna ìⁿ-nì cùu-o nchaa-o ndecu-o ndihì Xítohó Jesucrìstú cuèi cùu-o ñáyìu isràèl àdi ñá túú cùu-o, te cuèi cùu-o ñáyìu ñá túú tnàhì dàñá quee núú chíúⁿ pàtróóⁿ-xì àdi cuu-o ñáyìu dàñá queé núú chíúⁿ pàtróóⁿ-xì, te cuèi téé te cuèi ñadìhì ìⁿ-nì cùu-o nchaa-o ndecu-o ndihì Xítohó Jesucrìstú. ²⁹ Te nchòhó ndécú ndihì-ndo Xítohó Jesucrìstú, te cùu-ndo datná cue ñanì tnàhá ndíi Àbrahám, chi ní nduu táhú-ndó cùndecu váha-ndo nũú Yă Ndiöxí dàtná ní nduu táhú ndìj-áⁿ ndécú váha ndíi núú-gă, te ducaⁿ chi mee-gă ducaⁿ nĩ cachì-gá cunduu.

4

¹ Te nchòhó xìnì-ndó sã ìⁿ té lìhli chi vátá năgá cuáñaha tătá-dě cuu cuèndá-dé chi lìhli-dé, te ìⁿ-nì cùu-dé ndihì téé xìnu cuechi, dico na sáá nduu

cuèhnu-dé, te nduu táhú-dě nchaa sá ndécú ndìhi tátá-dě. ² Te xító-yu té lihli-áⁿ sáhnú-dě ndéé sàá nduu nǐ cachí tátá-dě sá cuǎñaha-dě sá ndúú táhú-dě. ³ Te ducaⁿ sǎtnahá-xi cùu nchoo, chi nchìcúⁿ nihnu-o nchàa nacuáa ní cáháⁿ cue téé ní xíndecu ndéé sanaha ní cùu. ⁴ Te ní sáá nduu nǐ quide Yá Ndiǒxí dàtná ní cachí-gá, te ní tendaha-gǎ Déhe-gá Xítóhó Jesucristú ní quixi-gá ñuyíú-a, ní dácácú ñàha ìⁿ ñadihí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ nǐ tendaha Yǎ Ndiǒxí Déhe-gá cuèndá sá vǎ cǎnchìcúⁿ nihnu-gá-ó nchàa nacuáa ní chídó tnùnì ndíi Moisés cuèndá ducaⁿ te cuu-o dèhe Yá Ndiǒxí.

⁶ Te Yá Ndiǒxí ní taxi-gá Espíritú Déhe-gá Xítóhó Jesucristú ndécú ndìhi-ndo chi cùu-ndo déhe-gá, te Espíritú-áⁿ chíndèe ñaha-xi xii-ndo te cǎchí-ndó: “Yòhó Dútú Ndiǒxí cúú-n Tátá méé-ndǐ”, duha cǎchí-ndó. ⁷ Te xiǎⁿ cútnùnì iní-ndó sǎ cúú-ndó dèhe Yá Ndiǒxí vitna, te ñá túú-gǎ cúú-ndó dàtná cue ñáyiú ñá túú tnàhí dàñá quee núú chíúⁿ pàtróóⁿ-xi. Te sá dúcáⁿ cùu-ndo déhe-gá, te Xítóhó Jesucristú taxi-gá nchaa sá vǎha ní cachí Yǎ Ndiǒxí nduu táhú-ndó.

Té Pǎblú ío sàni iní-dé cuèndá nchaa ñáyiú ndècu ichi Xítóhó Jesucristú

⁸ Te cútnàhá vátá quíndáá-gá iní-ndó tnùhu Yá Ndiǒxí ní xinu cuechi-ndo núú nchàa sá cǎchí-yu cùu ndiǒxí te ñá ndáá sá ndiǒxí cúú-xí. ⁹ Te vitna nchòhó cǎháⁿ ndìhi-ndo Yǎ Ndiǒxí, te mee-gǎ xìnì ñáhá-gǎ xii-ndo, te ñá túú ndùu váha-xi nanchòcáva iní-ndó cǎda tucu-ndo nacuáa ní xóo cada-ndo dǐhna, chi nchaa xiǎⁿ ñá túú vèdana nàndìhi-xi. ¹⁰ Te nchòhó cǎnehe íi-ni-ndo ndùu

cachí-ndó íí, te ðiu-ni ducaⁿ quide-ndo dava yoó ndihí dava cuíá, te ndi tnahá nduu sácóo vico ðiu-ni ducaⁿ quide-ndo cánehe íí-ndó ndùu-áⁿ. ¹¹ Te ío sàni iní-í cuèndá-ndó, chi na cuáháⁿ àúⁿ nã cuu ní dánèhé ñáhà-í xii-ndo tnúhu Yá Ndiõxí.

¹² Te càháⁿ ndàhú-í núú nchòhó ñáyiú ndècu ndihí-í ichi Xítóhó Jesucristú sá cádá-ndó dàtná quide-í ñá túú nchicúⁿ nihnu-í nchaa tnúhu ní cáháⁿ ndíi Moisés, chi yúhú quide-í vitna dàtná ní quide nchòhó ñá túú ní cãchicúⁿ nihnu-ndo nàcuáa ní cáháⁿ ndíi. Te cútnàhá ní xindecu ndihí ñaha-í xii-ndo ñí quide váha ñaha-ndo xii-í. ¹³ Te sa nàha-ndo sá cútnàhá ní cáháⁿ-í tnúhu Xítóhó Jesucristú núú-ndó ndèé díhna ní cuhú-í, núú xiãⁿ ní xindecu ndihí ñaha-í xii-ndo ñí cáháⁿ-í tnúhu-gá núú-ndó. ¹⁴ Te cuéhé sã ñí tnahá-í-áⁿ cúú-xí ñíⁿ cuéhé sã vã yóo tnàhí cundee ìní-xi cundecu ndihí ñaha xii-í ní cùu, dico nchòhó chi ío váha ní cáháⁿ ndihí ñaha-ndo xii-í, te ñá túú ní sàni cuehé ní sàni duha iní-ndó cuèndá-í, te ní cáháⁿ ndihí ñaha-ndo xii-í dàtná tnúhu sá yúhú cúú-í ñíⁿ espíritú xínú cuèchi núú Yá Ndiõxí àdi datná méé Xítóhó Jesucristú. ¹⁵ ¿Te ná ní tnahá-ndó núu ñá túú-gã sání váha iní-ndó cuèndá-í dàtná ní xóo cada-ndo ndèé díhna ío váha ní xóo caní iní-ndó cuèndá-í? Te na càchí tnúhu ndáá-í xii-ndo sã ío ní cuu iní ñáhá-ndó xii-í cútnàhá ní xindecu ndihí ñaha-í xii-ndo, te nándi sá ndécú ndihí-ndo taxi-ndo xii-í ní cùu, te núu dicó sá cúú te ndéé tinùu-ndo tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuèndá sá càháⁿ-í tnúhu ndáá tnúhu Yá Ndiõxí núú-ndó-ãⁿ?

¹⁷ Te ío ñáyiú ío váha càháⁿ ndihí ñaha xii-ndo, dico ñáyiú-áⁿ ñúhú cuéhé iní-yu, chi cuíní-yu sá vã cúú-gã cáháⁿ ndihí tnàha-o, chi mee-nã-yu cun-

decu ndihi-ndo cuiní-yu. ¹⁸ Te váha quède ñáyiú cãháⁿ ndihi ñaha xii-ndo ndihi tnúhu yiñùhu, te núu cuiní-yu cadá-yu ñⁿ sá váha sá cúú-xí-ndó. Te ducaⁿ-ni na cadá-yu cuèi òré ñá túú ndècu ndihi ñaha-í xii-ndo. ¹⁹ Te nchòhó ñáyiú ní sanu ichi-í ichi Xítohó Jesucrìstú càchí tnúhu-í xii-ndo sã quidé-xí iní-í dàtná quidé-xí iní ñⁿ ñadìhí ñaha sa ní tnahá òré cacu déhe-xi, te ducaⁿ quède-xi iní-í, chi ío vãi sani iní-í cuèndá-ndó dàtná ní xóo cada-í ndéé díhna, te ducaⁿ-ni càda-í ndéé ná sàá nduu càda-ndo nchaa nacuaá cãháⁿ Xítohó Jesucrìstú. ²⁰ ¡Te ío váha cada-xi te núu dìcò tnavíí sa ndècu ndihi ñaha-í xii-ndo cuèndá cãháⁿ-í núú-ndó nàcuáa cada-ndo, te ñá cútnùní iní-í nása cada-í cuèndá-ndó!

Cuèndá ndíi Àgár ndihi ndíi Sãrá

²¹ Te nchòhó ñáyiú cuiní canchicúⁿ nihnu nchaa tnúhu ní cãháⁿ ndíi Moisés, ¿náa ñá túú tècú tnùnì-ndó nàcuáa cãháⁿ-xi tnúhu ní chídó tnùnì ndíi? ²² Chi càchí tnúhu ní chídó tnùnì ndíi-áⁿ sã ndíi Àbrahám ní xindecu úú déhe ducuⁿ ndíi, te ñⁿ-dé ní cuu déhe ndíi ndihi ñadìhí méé ndíi ndíi Sãrá, te ñgá-dé ní cuu-dé déhe ndíi ndihi ñⁿ ndíi ní xinu cuechi nũ-yu ní xínani Àgár. ²³ Te sá dúcáⁿ ñí cacu déhe ndíi Sãrá, chi mee Yã Ndiõxí ní cundàhú iní ñáhá-gã xii-aⁿ, chi ducaⁿ ñí cachí-gá cada-gá. Dico ndíi ní xinu cuechi-ãⁿ chi ducaⁿ tnàhí ní nduu táhú ndíi-áⁿ sã cóo dèhe ndíi. ²⁴ Te na càchí tnúhu-í xii-ndo nã cúú sã nánèhé ndíi ndúú cue ndíi dìhí-áⁿ. Te úú xito ní cãháⁿ Yã Ndiõxí nàcuáa cada-gá, te ñⁿ ndíi-áⁿ nánèhé ndíi nàcuáa ní cãháⁿ Yã Ndiõxí xito díhna nuu, te ñgá tucu ndíi-áⁿ nánèhé ndíi nàcuáa ní cãháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa

ní xáhaⁿ Yă Ndiöxí xii ndíi Moisés yucu Sinài cada ñáyiú, te nchaa ñáyiú nchìcúⁿ nihnu nchaa tnúhu-án cúŷ-yu dàtná déhe ndíi Àgár téé ní xinu cuechi, chi téé-án ñà túú tnàhí ni dàñá-dé quee-dé núú chíúⁿ pàtróóⁿ-dě, te ducaⁿ sãtnahá-xi cùú-yu chi nchìcúⁿ nihnú-yu nchaa nàcuáa ní xáhaⁿ Yă Ndiöxí xii ndíi Moisés. ²⁵ Te tnúhu Àgár quéé-xi: Yucu Sinài, te yucu-án yíndèhu-xi nacióⁿ Àrabiá. Te ndíi Àgár-án nánèhé tucu ndíi cue ñáyiú ndècu ñúú Jerusàlén, chi ñáyiú-án ndécú-ní-yu dàtná ní xíndecu ndíi Àgár ndíhi déhe ndíi, chi cue ndíi-án ní cuu cue ndíi ñáyiú ñá túú tnàhí ni dàñá quee núú chíúⁿ pàtróóⁿ-xi, te ducaⁿ sãtnahá-xi cùú ñáyiú-án chi nchìcúⁿ nihnu-ní-yu nchaa nàcuáa ní cáháⁿ ndíi Moisés. ²⁶ Dico nchoo ñí nduu táhú-ó cùndecu-o ñúú Jerusàlén sáa núú ndécú Yă Ndiöxí, te vitna chi ñá túú-gă nchìcúⁿ nihnu-o nchaa nàcuáa ní cáháⁿ ndíi Moisés. ²⁷ Te duha càháⁿ-í, chi núú tütú Yă Ndiöxí càchí-xi:

Yòhó ñaha ní nduu táhú vă cóó dèhe-xi ni cùú, vitna cana saa-n sã cúdíí ñí-n cuèi vátá quìní-gá-n năsa càcu ñⁿ landú.

Te cuèi ní cuu táhú-n sã vă cóó dèhe-n ni cùú dico ío-gá titní déhe-n còo dacúúxí xíchí ñí cuu táhú tnàhí sá cóó dèhe-xi.

Duha càchí-xi núú tütú-gá. ²⁸ Te nchoo cuè ñáyiú ndècu ichi Xítohó Jesucrìstú vitna cùú-o datná ndíi Isàác, chi ndíi-án ñí cacu ndíi, chi mee Yă Ndiöxí ní cachí-gá sá cáci ndíi. Te ducaⁿ sãtnahá-xi cùú nchoo chi ní nduu-o dèhe-gá vitna chi ducaⁿ ñí cachí tucu-gá cunduu. ²⁹ Te déhe ndíi Àgár ní nduu táhú tnàhí ndíi sá cáci ndíi ñuyíú-a, te ndíi-án

nǐ cuu úhú iní ndíi ndíi Isàác, te ndíi Isàác-án chi Espíritú Yă Ndiǒxí ní quide ní cacu ndíi. Te ducaⁿ sǎtnahá-xi cùu vitna, chi nchaa nchoo ñăyiu ndècu ndihì Espíritú Yă Ndiǒxí cúú úhú iní ñáhá ñăyiu xii-o. ³⁰ Te núú tütú Yă Ndiǒxí cǎchí-xi: “Chí nácuǐcúⁿ xíchí xínú cuèchi ndihì déhe-xi na nùhú-yu, chi déhe xíchí xínú cuèchi-án ñà túú nǎ níhí-dě nduu táhú-dě, chi mee-ni dēhe ñaha ndècu vehe-xi nduu táhú-dě sá cuǎñaha tǎtá-dě”, duha cǎchí-xi núú tütú-gá. ³¹ Te nchoo cuè ñăyiu ndècu ichi Xítóhó Jesucristú ñá túú-gǎ cúú-ó dàtná cúú dēhe ndíi ní xinu cuechi-ǎⁿ, chi ní cuu-o vitna datná cúú ndíi ní nduu táhú nchaa sá nǐ sǎñaha tǎtá-xi-án. Te ducaⁿ nǐ cuu, chi Yă Ndiǒxí ní dácǎcu ñaha-gǎ xii-o cuendá sá vǎ cǎnchícúⁿ nihnu-gá-ó nchàa nacuáa ní cǎháⁿ ndíi Moisés.

5

Canchicúⁿ nihnu-ni-o ichi Xítóhó Jesucristú

¹ Te Xítóhó Jesucristú ní quide-gá nacuáa vá cǎní iní-ó sǎ nánihí tǎhú-ó te núu na cǎnchicúⁿ nihnu-o nacuáa ní cǎháⁿ ndíi Moisés, te ñiu-ni ducaⁿ cǎni iní-ó cùndecu-o te vá ngǒo cǎni iní-ó sǎ nánihí tǎhú-ó te núu na cǎnchicúⁿ nihnu-o càda-o nacuáa ní cǎháⁿ ndíi, chi núu ducaⁿ na càda-o te ío dandòho-o mee-o datná ní xóo ndoho-o cǔtnàhá vátá cùndecu-gá-ó ichi-a.

² Te yúhú té Pǎblú cuení-í sá cùndedóho-ndo ñⁿ tnúhu na cǎháⁿ-í-a. Te núu nchòhó cuáha-ndo sēñá ñⁿ-ndo cuendá sá sàndáá iní-ndó nacuáa ní cachí ndíi Moisés cada-ndo, te núu ducaⁿ na càda-ndo ña, te àúⁿ nǎ cuu ndècu-ndo ichi Xítóhó Jesucristú te núu ducaⁿ. ³ Te dàtná ní cachí-í xii-ndo, te ñiu-ni ducaⁿ cǎháⁿ tucu-í vitna sá nǔu nděda-ni càa ñⁿ tée

na cuǎha-dé sèñá ñii-dé, te xini ñuhu-xi sá dàcutíí tàú-dé cada-dé nchaa nàcuáa ní cáháⁿ ndíi Moisés, ⁴ Te nchaa nchòhó ñáiyu sàni iní sá ñà túú-gǎ cuéchi-xi ndècu núú Yǎ Ndiǒxí cuèndá sá nchìcúⁿ nihnu-ndo nchàa nacuáa ní cáháⁿ ndíi Moisés, ñǎ túú-gǎ ndécú-ndó ndìhi Xítóhó Jesucrìstú, te ni Yǎ Ndiǒxí ñǎ túú-gǎ cùndàhú iní ñáhá-gǎ xii-ndo càda váha ñaha-gǎ. ⁵ Dico nchaa nchoo ñáiyu sàndáá iní ñáhá xii-gǎ cùdìu-o núú-gǎ, chi chìndee ñaha Espíritú-gǎ xii-o, te ndètu cahnu-ná-ó sàá nduu cùñaha núú Yǎ Ndiǒxí xii-o sǎ cùdìu-o núú-gǎ. ⁶ Te nchoo cuè ñáiyu ndècu ndìhi Xítóhó Jesucrìstú ñⁿ-ni quìde-xi cuèi na cuǎha-o sèñá ñii-o àdi vá cuǎha-o, chi ñǎ túú chìndee ñaha-xi xii-o nacuáa cundecu váha-o ndìhi-gǎ. Te ñⁿdìi díi-ni sá xíní ñuhu-xi quìndáá iní-ó Xítóhó Jesucrìstú, te núu ducaⁿ na càda-o te cuu iní-ó cuè tnaha ñáiyu-o.

⁷ Te nchòhó ío váha quìde-ndo ndecu-ndo ichi Yǎ Ndiǒxí ní cùu, te vitna cùñuhu-í sá ñà túú-gǎ sàndáá váha iní-ndó tnùhu-gǎ, te ducaⁿ quìde-ndo chi ndècu ñáiyu sànu ichi ñaha xii-ndo ìngá ichi. ⁸ Te ñǎ díú Yǎ Ndiǒxí Yaá ní cáháⁿ ñáhá xii-ndo ducaⁿ ni cachí-gǎ cada-ndo sǎ vǎ quìndáá-gǎ iní-ndó tnùhu-gǎ. ⁹ Te nchòhó xíní-ndó sǎ núu luha levadùrá ná quǐhu yuchi te dàndaa-xi. Ducaⁿ sǎtnahá-xi cùu ñáiyu dándahú ñáhá xii-ndo, chi cuìní-yu dàcuíta nihnu ñáhá-yu xii-ndo nchàa-ndo. ¹⁰ Te yúhú cùtnùní ndáá iní-í sá Xítóhó Jesucrìstú chìndee ñaha-gǎ xii-ndo cuèndá sá ñǎ túú nǎgǎ tnúhu quìndáá iní-ndó, dico nchaa ñáiyu ducaⁿ dándahú ñáhá xii-ndo nacháhu-yu núú Yǎ Ndiǒxí nchaa sá quídě-yu cuèi náí-gǎ ñáiyu cùú-yu.

11 Te càchí tnúhu-í xii nchòhó ñáyiú ndècu ndìhi-í ichi Yá Ndiöxí sá nùu dìcò dànehé-ni-í ñáyiú sá cuãha-yu sèñá ñí-yu dàtná ní cachí ndíi Moisés ñá, te vá yõo cuu úhú iní ñáhá xii-í ní cùu, te ni vã tũu úhú iní-yu cuendá sá ñí xíhí Xítóhó Jesucrístú núú cùrúxí ní cùu. 12 Te nchaa ñáyiú dàsatú iní ñáhá xii-ndo sã cuãha-ndo sèñá ñí-ndo, te váha-gá sá ná cáda-yu mèe-yu ñí tnúndòho, te ñá díú sã dúcáⁿ cànuichi ñáhá-yu xii-ndo cùndecu-ndo.

13 Te nchòhó ñáyiú ndècu ndìhi-í ichi Xítóhó Jesucrístú ñi-gá ní taunihnu ñaha-gã xii-ndo cuendá sá vã cáncùcúⁿ nihnu-gá-ndó nchàa nacuaá ní cáháⁿ ndíi Moisés, dico vá cání ñí-ndó sã sã dúcáⁿ ñí taunihnu ñaha-gã xii-ndo, te cuu-ni cada-ndo nãndi sá cuèhé sá dúhá vëxi iní-ndó, dico cuu iní tnáhá-ndó ñí-ndo te chindee tnàha-ndo. 14 Chi ducaⁿ cáháⁿ Yá Ndiöxí sá cúú ñí-ó cuè tnaha ñáyiú dàtná cúú ñí-ó mèe-o. Te núu ducaⁿ na càda-o, te quide-o nchaa nacuaá tàú-xi cada-o dàtná cáháⁿ nchaa tnúhu ní chídó tnùní ndíi Moisés. 15 Te núu nchòhó cúú úhú iní tnáhá-ndó ndècu-ndo, te ñá túú quide váha-ndo te núu ducaⁿ quide-ndo, dico yúhú càchí-í sá vã dúcáⁿ-gã cada-ndo cùndecu-ndo cuendá sá vã dácuíta nihnu tnàha-ndo.

Nàcuáa sàni iní ñáyiú ndècu ichi cuehé ichi duha ndìhi nàcuáa sàni iní ñáyiú ndècu ndìhi Espíritú Yá Ndiöxí

16 Te na càchí tnúhu-í xii-ndo sã cáda-ndó nchàa nacuaá cuìní méé Espíritú Yá Ndiöxí cada-ndo, te ducaⁿ te vá cání-gã iní-ndó càda-ndo nãndi nchaa sá cuèhé sá dúhá sàni iní méé-ndó. 17 Chi nchaa xíáⁿ ñá túú tnáhá tnúhu-xi ndìhi Espíritú Yá Ndiöxí. Te ñi-ni ducaⁿ quide Espíritú Yá Ndiöxí, chi ñá túú

tnàhá iní-xi nchaa sá cuèhé sá dúhá sàni iní-ndó. Te sá dúcáⁿ ñà túú tnàhá tnúhu tnàha-xi xiáⁿ ñá túú nihí ndéé-ndó càda-ndo ìⁿ sá vâha sàni iní-ndó càda-ndo. ¹⁸ Te núu quide-ndo nchaa nacuáa sànu ichi ñaha Espíritú Yá Ndiõxí, te ñá túú-gã táxí tnùní ñáhá nchàa tnúhu ní chídó tnùní ndíi Moisés xii-ndo.

¹⁹ Te nchaa ñáyiu xìní-yu nchaa nàcuáa quide ñáyiu quide cuehé quidé dùha. Te duha quidé-yu: Cue téè càháⁿ ndihi-güedé ñáyiu dìhí te ñá díú ñàdihí-güedé cúŭ-yu, te diu-ni ducaⁿ xíquide cue ñáyiu dìhí, te nándi-gá nchaa sá cuèhé sá dúhá cuáháⁿ véxi-yu quidé-yu. ²⁰ Te quide cahnú-yu nchaa sá càchí-yu cùu ndiõxí te ñá ndàá sá ndiõxí cúú-xí, te quide nduu tnahá-yu, te cùu úhú iní tnáhã-yu, te nàá-yu, te cùu cuiñú tnáhã-yu, te ío yáchí cúděⁿ-yu, te ndúcú-yu mee-ni sã cúú-xí mée-yu, te ñá túú cùu ìⁿnuú-yu cundecú-yu, te quide d^ìⁿ tnahá-yu. ²¹ Te cùu cuedú ínŷ-yu nchaa sá ndécú ndihi dava-gá-yu, te sàhni tnahá-yu, te ío quihú-yu, te ndì cuu ndi cuú-yu quidé-yu nchaa sá cuèhé sá dúhá, te nándi-gá nchaa sá cuèhé sá dúhá quidé-yu. Te sa càchí tnúhu-í xii-ndo sã ncháá ñáyiu ducaⁿ xíquide vá ndúú tãhŷ-yu cundecú-yu núú ndécú Yá Ndiõxí táxí tnùní-gá.

²² Dico Espíritú Yá Ndiõxí chindèe ñaha-xi xii-o cuu iní tnáhá-ó, te cùdíí iní-ó ndècu-o, te ío váha cùu iní-ó, te càhnu iní-ó, te váha iní-ó, te cùndahú iní tnáhá-ó, te quide ndáá-ó ndècu-o. ²³ Te ndàhú iní-ó, te quide-o nchaa nacuáa tàú-ó càda-o, te nchaa xíáⁿ chindèe ñaha Espíritú Yá Ndiõxí quidé-ó, te núu ducaⁿ quide-o, te vá yõo ìⁿ-gá cáháⁿ sá ñà túú quide váha-o ndècu-o. ²⁴ Te nchoo cuè ñáyiu ndècu ndihi

Xítóhó Jesucrístú, sa nàha-o sá ñí xíhí-gá núú cùrúxí sá cuendá-ó, núú xíáⁿ duuⁿ duuⁿ ní dáñá-ó nchàa ichi cuehé ichi duha, te ñá túú-gã táxí tnùní ñáhá ñì ìⁿ sá cuèhé sá dúhá sã ñí xóo cani iní-ó ní cùu.
²⁵ Te vitna ní ngúndecu ndìhi-o Espíritú Yã Ndiõxí chíndèe ñaha-xì, te xìni ñuhu-xì sá cádá-ó nàcuáa sànu ichi ñaha Espíritú-gá cada-o.

²⁶ Te vá cádá càhnu-o mee-o, te vá ndúcú-ó plètú, te ni vã cúú cuèdú iní-ó sã ndécú ndìhi tnaha ñáyiú-o.

6

Chindee tnàha-o ìⁿ ìⁿ-o

¹ Te nchòhó ñáyiú ndècu ndìhi-í ichi Xítóhó Jesucrístú càchí tnúhu-í xii-ndo sã nùu ìⁿ ñáyiú ndècu ndìhi-ndo ichi-gá ní quidé-yu ìⁿ sá ñà túú tàú-yu cadá-yu núú-gã, te nchòhó ñáyiú quide váha ndècu ndìhi Espíritú Yã Ndiõxí cáháⁿ-ndó dõho cue ñáyiú ducaⁿ xíquide-áⁿ cuendá nucúnu ichí-yu, te vii vii cáháⁿ ndìhi-ndõ-yu, te ío coto-ndo mée-ndo cuendá sá vã cádá-ndó ìⁿ sá ñà túú tàú-ndó càda-ndo núú-gã. ² Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yãha-ndo. Te núu ducaⁿ na càda-ndo, te quide-ndo nchaa nacuéa ní cáháⁿ Xítóhó Jesucrístú cada-o.

³ Te núu ío ìⁿ-ndo càchí-ndó sã ìo váha quide-ndo ndecu-ndo ichi Yá Ndiõxí te ñá ndàá ñã, te dícó dándàhú-ndó mée-ndo sá dúcáⁿ quide-ndo. ⁴ Te ndi dííⁿ ndì dííⁿ càda cuendá-ndó nùu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí ìní-ndó sã cúú-xí mée-ndo, te vá cání ìní-ndó sã quidé vãha-gá-ndó

dàcúúxí dàva-gá-yu. ⁵ Chi tàú-ó sǎ ndì dííⁿ ndì dííⁿ càda cuendá-ó nàcuáa ndècu-o.

⁶ Te nchaa nchòhó ñáyiu dàcuaha tnúhu Yá Ndiõxí chindee-ndo cuè téè dàcuaha ñaha xii-ndo tnúhu-gá cuáñaha-ndo nǎndi sá xíní ñùhu-güedé.

⁷ Te vá dándàhú-ndó mèe-ndo cundecu-ndo, chi vá cúú cùdiquí ndeé-ó Yǎ Ndiõxí, chi nchòhó xíní-ndó sǎ núu na càda váha-o cùndecu-o, te cùu-xi ìⁿ sá vǎha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. ⁸ Te núu quide-o nchaa sá cuèhé sá dúhá sàni iní-ó, te d̄u-ni xíǎn dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yǎ Ndiõxí xii-o, te cundecu ndih-i-o Yǎ Ndiõxí ni caa ni quíhíⁿ. ⁹ Te xìni ñuhu-xi vá dáñá ndèè-ó càda váha-o cùndecu-o, te ducaⁿ te sáá nduu càda váha ñaha Yǎ Ndiõxí xii-o, te núu vá ná tǔhú iní-ó càda váha-o cùndecu-o. ¹⁰ Te cada-o sǎ vǎha sá cúú-xí nchaa tnaha ñáyiu-o vitna ndecu-o ñuyíú-a, te ío-gá tàú-ó chindee-o cue ñáyiu ndècu ndih-i-o ichi Xitohó Jesucristú.

Tnúhu ndéé núú nǐ ndih-i-ná

¹¹ Te cundehe-ndo sǎ ndǎa ndǎa lètrá téè-í núú tütú-a sá cúú-xí-ndó. ¹² Te nchaa ñáyiu quide yicá sá cuǎha-ndo señá ñii-ndo dàtná ní cachí ndíi Moisés, ñáyiu-áⁿ cúú-yu ñáyiu cuíní cud̄u núú tnàha ñáyiu-xi. Te ducaⁿ quidé-yu cuendá sá vǎ ndóhǒ-yu cuendá nchaa tnúhu sá dánèhé ñáhá sǎ nǐ xíhí Xitohó Jesucristú núú cùrúxí. ¹³ Te ni ñáyiu sa ní ngúndecu ndih-i señá ñii-xi ñá túú quidé-yu nchaa nàcuáa ní cáháⁿ ndíi Moisés, dico mèe-yu cuíní-yu sá cuǎha-ndo señá ñii-ndo. Te ducaⁿ quidé-yu chi quide cahnú-yu mèe-yu núú

nchàa dava-gá ñáyi. ¹⁴ Te yúhú chi ñá túú quide cahnu-í mée-í cuendá nchaa sá quidè-í, chi mee-ni sã ïo cùu váha iní-í sá Xítóhó Jesucrìstú ní xíhí-gá núú cùrúxí cuendá-ó. Te ñu cuendá sá ní xíhí-gá ñá túú-gã ndécù-í ichi cuèhé ichi duha, te ni ñà túú-gã táxí tnùní ñáhá nì ìⁿ sá cuèhé sá dúhá xì-í. ¹⁵ Te ñá túú ñã chíndèe ñaha-xi xii-o cuéi na cuãha-o sèñá ñii-o àdi vá cuãha-o, chi ndècu ndihi-o Xítóhó Jesucrìstú, te ní nduu-o dàtná ìⁿ ñáyi saa, te xĩⁿ cúú-xí sã ïo-gá xíní ñùhu-xi. ¹⁶ Te xìcáⁿ táhù-í núú Yã Ndiõxí sá ncháá nchòhó ñáyi quide nchaa nacuaá càháⁿ-í-a cundecu nahi-ndo, nchòhó ñáyi cùu cuendá Yã Ndiõxí dàtná ñáyi isràél chi ñáyi-áⁿ ñi cachí-gá sá cúú cuendá-gá. Te mee-gã ío cundàhú iní ñáhá-gã xii-ndo chìndee ñaha-gá.

¹⁷ Te není vitna cùiní-í sá vã yõo ìⁿ-gá chidácá nihnu ñaha xì-í cuendá chùⁿ quide-í, chi yayàcáⁿ sa ní nduu tílòhó ñii-í cuendá sá ndóhò-í cuendá Xítóhó Jesucrìstú.

¹⁸ Te nchòhó ñáyi ndècu ndihi-í ichi Xítóhó Jesucrìstú xìcáⁿ táhù-í núú-gã sá ïo na chìndee ñaha-gá xii-ndo nchàa-ndo. Te ñucaⁿ na cùnduu. Te ío chí cáda ndèe iní-ñã vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939